

# **Maemo a Tlhekefetso ka hara naha ea Lesotho**

## **Puo ea Letona le khabane la Tekano le Bacha, Lipapali le Boithapollo**

Bahlomphehi litho tse khabane,

Ke hlaha kapela ntlo ena ka ts'oenyeho e kholo le mesarelo. Tlhekefetso e bonahala e ntse e tsoelapele ho nka bophelo ba maqheku, basali, banana le bana ka hara naha ea Lesotho.

Tlhekefetso e etsahala ka litsela tse fapakaneng 'me hangata lebaka ke matla ao mohlekefetsi a nang le 'ona holima mohlekefetsuoa. Tlhekefetso, e sebelisoa e le sebetsa se tiisang bompoli holima ba fokolang ka

matla. Ka hona tlhekefetso e beha ba fokolang tsitsipanong e ba hlokisang bolokolohi le boitsepo!

Litlaleho tsa sepolesa tsa litlolo tsa molao, li bontsa ho phahama ha tlhekefetso ka hara malapa ekasita le ka hara Sechaba ka kakaretso. Haesale covid – 19 e bile teng tlhekefetso e bonahala e hloa mekoalaba, 'me taba ena e re ts'oentse haholo re le Lekala.

Tlhekefetso e etsahalang malapeng e thata ho e hlokomela ka ha e etsoa ke batho bao mohlekefetsuo a ba ts'epang, ho sebelisoa lits'oso hore eo a sitoe ho tlaleha.

Re sa tsoa makatsoa ke monna ea khōlang bongoana ba barali ba hae ka le reng kaha 'mabona ha mo etsetse ban aba bashanyana, barali ba se ba tla mo etsetsa. Athe bang ba banna, ba re, ha bahatsa ba

bona ba ile mesebetsing, ba khola bongoana ba barali, ka le reng ba hobella ka matlung a bona. Litaba tsena ha se pale, lia etsehala, 'me ruri ha se tsela eo Sesotho se holisang batho ba batona ka eona. Kholiso ea ngoana Mosotho ke hore ba matla ba baballa ba fokolang ka matla.

Le tla hopola beng ba ka hore re ile ra utloa ka baroetsana ba ileng ba khaoletsoa ba akhang eane oa Maputsoe ea neng a kena sekolo Fokothi. Re tla hopola ea ileng a khaoletsoa a ile boikoetlisong. Re tla hopola ea ileng a koetloa ka koloi ea baeti, re tla hopola eane eo litho tsa hae li neng li jetsoe ka morung Santa Moneka mono. Mosali e mong ea nang le bokooa, a hlaseloa a betoa a ba a sothoa molala. Re hopola nkho e ileng a hlaseloa ha hae Pitseng, a betoa a ba a bolaoa. Re tla hopola nkho e mong

ea ileng a betoa, a seoa mpa hoaba hoa nkoa hloho ea hae, hoo a bolokiloeng e le sieo. Maobane ke bile Qacha's Nek, Motse Mocha moo ngoanana ea nang le bokooa a betiloeng a ba a bolaoa. Kajeno ke ilo hlaha Koro-Koro, teng nkhono o ile a betoa a ba a bolaoa.

Matsatsing ana re sa tsoa utloa ka monna ea bolaileng mora eo a ikanetseng ho rata 'mae.

Tsena ke mehlala feela bahlomphehi ea tse ileng tsa fihla litsebeng tsa ka. Kea tseba hore tse sa fihlang ho 'na li ngatahali. Ke kopa ntlo ena e khabane e re thuse ka ho fetisa melao e tla tsireletsa Sechaba sena sa ntate Motlotlehi ka mekhahlelo eohle ea sona, haholoholo ba se nang matla a ho itoanela.

Litlaleho tsa ho khakhathoa le ho sotloa ka hara malapa le tsona li nyarosa mmele. Likhohlano le tsekisano lipakeng tsa banyalani li bonahala li tsoala lefu mme bana ba sale e le likhutsana.

Ho bonahala malapa e se e se sebaka se bolokehileng ho basali, maqheku le bana. Ke ka hona bahlomphehi, litho tse khabane, ke ipiletsang ka boikokobetso, hore ntlo ena e potlakise ho fetisa molao o khahlanong le tlhekefetso ka malapeng hobane bosieo ba molao oona:

- 1)Bo etsa hore litaba tsa tlhekefetso ea ka malapeng li se ke tsa tsepama hantle kaha li fuoa botoloki bo ikamahanyang le melao e teng, e nang le bofokoli ba ho se hlalohanye lipolao tsa malapeng ho tse tloaelehileng;

2) Bo etsa hore lipalo palo tsa liqholotso tsena li se ke tsa fumaneha ha bobebe kaha manane a litlolo tsa molao a hlahlolloa ho latela molao o fetisitsoeng ke Paramente;

3)Bo hlaisa naha hampe ka hare ho litho 'moho le eona hloahloeng ena e ka boroa ho Aforeka, Kopanong ea linaha tsa Aforeka, linaheng tsa selekane le mokhatlong ea machaba. Empa ka holimo ho tsohle e fana ka seriti se sebe ho batseteli.

Bahlomphehi,

**Tlhekefetso ka bao e seng ba malapa** le eona e teng, ebile joale le eona e totile. Maqhekoana le banana ba khaoletsoa le ho betoa ke bashanyana ba fetohileng batlatlapi le likoeta. Ha ba tšabe ho timetsa 'mopō

ona oa ntate Molimo, ka ho ba hlekefetsa, ho ba beta ba ntano ba bolaea.

Bahlomphehi ruri kea ipiletsa, ke kopa le molao ona oo ke sa tsoa o teka ka Labobeli o mpe o fete le oona pele re ea likhethong – bahlolohali ba seboko ke tthekefetso eo ba e etsetsoang ke ba malapa holima thepa eo ba e sebelitseng la balekane ba bona. Ba bang ba be ba bolaeloe eona thepa eo.

Re le lekala la Tekano, mosebetsi oa rona oa ho tliša melao e ka hlolang bothata ba tthekefetso re o entse, re kopa tlatsetso ea bophethahatsi e le hore re be le sechaba se bolokehileng, tthekefetso e etsa sechaba se bolutu, e nonyetsa moruo oa malapa le oa naha. Bohle re lokela ho nka boikarabelo ba ho ema khahlanong le tthekefetso ka mefuta eohle ea eona.

KHOTSO PULA NALA